

22/10/1998

Bonus: Cuepacs yakin syor dikaji

KOTA BHARU, Rabu - Cuepacs yakin Perdana Menteri, Datuk Seri Dr Mahathir Mohamad, akan mendengar cadangan dan pandangannya berhubung isu pemberian bonus kepada 800,000 kakitangan awam, sebelum membuat keputusan muktamad.

Setiausaha Agungnya, Siva Subramaniam, berkata Cuepacs bertanggungjawab mengemukakan pandangan bagi pihak kakitangan kerajaan dan terpulang kepada pihak tertinggi untuk mempertimbangkannya berdasarkan asas yang dikemukakan.

"Kita memahami masalah kegawatan ekonomi yang dihadapi oleh kerajaan dan Cuepacs akui adalah sukar bagi kerajaan meluluskan pemberian bonus kepada kakitangannya dalam keadaan seperti sekarang.

"Bagaimanapun, Perdana Menteri biasanya sentiasa bersimpati dengan kakitangan kerajaan dan tidak pernah menolak tuntutan berpatutan yang dikemukakan.

"Kita rasa Dr Mahathir akan mendengar pandangan Cuepacs berhubung isu bonus ini dan membuat pertimbangan sewajarnya sebelum mengambil keputusan muktamad," katanya.

(END)